

2130 -
Ing ADOLF ŠERBETIĆ

**RAZVOJ
ŠUMARSTVA
U BOSNI I HERCEGOVINI**

Preštampano iz knjige:

»Bosna i Hercegovina
kao privredno područje«



Sarajevo 1938

Štamparija »Bosanska Pošta«

UVOD

U našoj državi a posebno u Bosni i Hercegovini šumarska privreda glavni je faktor našega ekonomskog života. Dovoljno je da bacimo pogled na procenat šumovitosti po površini, na izvoz po količini vrijednosti, na broj uposlenog radništva, na narodne potrebe, na organizacije privrednih ustanova, na srazmjerno angažovanje kapitala, — pa da vidimo da je šumarska privreda svuda na prvom mjestu. Iza poljoprivrede nema ni jedne privredne grane koja je narodu bliža i potrebnija od šumarske. Šuma kao objekat daje direktne i indirektne koristi čovjeku. Direktne koristi poznate su u raznim glavnim i sporednim šumskim proizvodima, koji na jednoj strani služe direktnoj upotrebi i podmirivanju narodnih potreba, a na drugoj kao sirovina služe za industrijsku tehničku i hemijsku preradu. — Već ove direktne koristi toliko su brojne da ih je skoro nemoguće pbrojati. Osim ovih direktnih, imamo i indirektnih — posrednih koristi od šuma, time što nam one regulišu oštru klimu, a naročito oborine (padaline), što zaštićuju tlo i čuvaju objekte od povodnja i popuzlina, održavaju vrela, djeluju blagotvorno na zdravlje i raspoloženje, igraju odsudnu ulogu u narodnoj odbrani i t. d. i t. d. Kad se zna da bezmalo polovina površine Bosne i Hercegovine pokriva šuma i šumsko tlo, onda je jasno da je šuma kao objekat za nas od velikog značenja a njena privreda sastavni element narodnog života. Ovo zadnje vrijedi naročito za našeg težaka, koji svu svoju potrebu na šumskim proizvodima, kako glavnim tako i sporednim, pokriva besplatno iz državnih šuma. Da bi to mogli još bolje ocijeniti, iznijet ćemo približne brojčane podatke.